



序

按西湖志韜光菴舊名巢塢唐代宗朝
蜀僧韜光者辭師出遊師囑曰遇天可
前逢巢則止至此值白太傅樂天守郡
曰是吾師之命也遂卓錫焉與白唱和
往復後人卽以韜光名其菴位純陽子



其中而境幽景曠來者便擬諸蓬閩間
矣其地當北峰之右靈鷲之上海鷗江
練卷幔收之而西湖烟樹三竺雲巒了
了都在鳥下予嘗讀書山中花月晨夕
把斗酒坐金蓮池上摹蕙子瞻趙閱道
之題名讀孫高士高忠憲陳黃門之遺

詠未嘗不爲之俯仰前型酒酣耳熱或
登峰頂四望痛哭以繼西臺之慟或梯
藤而下過澗西橋濯足冷泉作長嘯數
聲山谷響應當是時不自覺其散誕至
此而古近體之作亦不下百餘篇後卽
稍稍自悔盡焚其稿然狂奴故態至今

樵僮雲客猶能稱道之越茲且二十有
三年矣中間汗漫出遊隻身萬里椎心
落魄髮白齒搖嘗思以歸里之餘間尋
舊遊而問道乃愁緒無端忽忽中止三
時夢寐往返實勞洞口桃花寧不笑劉
郎寂寞耶雖然酒人縱老狂態未消猶

能以筆墨張我山靈也况我方外交如
山止者擅風雅繼韜光之席扶主宗風
先後一揆于焉再盛一日貽書於予兼
彙古今名人題詠見寄爲學使王公捐
俸屬付剞劂索予序之予惟王公之蒞
吾泚也以制藝古學振興多士一時懷

瑾握瑜者流無不拔而出之有冀北空
群之目尤汲汲於博採詩聲爲山川潤
色比諸樂天當日夫何多讓予以村鄙
農人荷鋤自矢文章之事更無所知乃
葑菲勿遺俾得附名簡端以道其今昔
之感媿孰甚焉媿孰甚焉

康熙歲在著雝執徐塞壯之月中秋日
觀山樵朱邇邁人遠氏題于槃溪
之南陔草堂



序

靈隱寺右由澗西橋盤折而上怪石鱗次或仰或伏如虎踞如獅蹲溪水傍石而流淙淙有聲其旁多松栢楓樟之屬竹萬竿緣溪叢生參天而立溪多蒲葦亦或生金碧魚乘流上下沿溪行路迂山峻杖竹行可四五里始見紺宇巍然登而肆目焉澄江碧海彌天在望而聖湖則如鏡照面隱隱江帆湖艇在林木間靈隱寺顧處其下白雲蓋之蓮花峰側峙其右東有峰曰獅峰有亭曰候仙南有洞曰維摩洞有池曰

金蓮池日月繫天風物竒麗誠西山之最勝者也唐
白居易刺杭州愛斯境幽曠屢枉車過時禪士韜光
結茅棲止顏其菴曰韜光志隱也間與刺史唱酬至
今石鐫猶存繼之縉流稍集構祠于呂仙人洞賓祠
左則禮佛即舊茅地也澄泉慧光兩人又從而闢之
亭臺池沼迥然生新遊者至此輒經日不肯去必
遺詩自高忠憲以下約有五百餘首其韜涵澹灑突
兀蒼翠蕩若無外悠然自得之概較與韜光稱是余
嘗讀書其上菴之僧山止後余受詩所作詩清而逸

余最愛之曰若何自而得山止笑而發笥取前輩所
存詩授余卒讀之緣知山止才雖高而亦出于茲山
之勝名公卿大夫之誌勝其有以起之也若是則諸
公亦可謂不虛所遊矣山止生古今之際居斯地也
而忍使古今人之才之名俱滅歿不傳耶於是錄而
編之梓以傳焉而并繫之以圖山如其峙水如其流
而止余憔悴以老而恒樂名山與斯文以並傳也是
為序

康熙二十八年歲次己巳秋七月之望錢塘鄧錫璠
蓉洲氏題於有竹書舍



募刻韜光詩文小引

環西湖而刹者以十數韜光最勝自靈隱入磴路幽
折至則江山森羅氣象開豁石壁出泉琤琮作風雨
聲靜憇少時令人名利之心頓盡真佳絕處也自白
傳留題後遊者率有製作今住持僧所蓄詩詞記銘
不下五百餘首懼楮素易漫滅久而失傳將梓爲一
集而難其費謀於余余曰是易耳凡留詩文者孰不
欲傳孰不樂與古人並傳計此剞劂之事不過斤金
可了儻來此者或乍遊或舊遊若已作若未作各捐

少資助成勝事既爲古人謀亦自爲謀策之甚便試
號於衆當有應者如或不信請以余爲嚆矢
康熙乙丑仲冬吳江潘耒題於飛雨軒

韜光菴紀遊初編

白居易

寄韜光禪師詩

白屋炊香飯葷羶不入家。濾泉澄葛粉洗手摘藤花。
青芥除黃葉紅薑帶紫芽。請師來伴食齋罷一甌茶。

韜光禪師答詩

山僧野性好林泉。每向巖阿倚石眠。不解栽松陪玉
勒唯能引水種金蓮。白雲乍可來青嶂明月難教下
碧天。城市不能飛錫去。恐妨鶯囀翠樓前。

唐刺史白居易

遊靈隱寺贈韜光禪師

一山門作兩山門。兩寺元從一寺分。
東澗水流西澗水。南山雲起北山雲。
前臺花發後臺見。上界鐘聲下界聞。
遙想吾師行道處。天香桂子落紛紛。

白居易

候仙亭詩

蹇步垂朱綬。華纓映白鬚。
何因駐衰老。只有且歡娛。
酒興還應在。詩情可更無。
登山與臨水。猶未要人扶。

又

謝安山下空携妓。柳惲洲邊只賦詩。
爭及湖亭今日會。嘲花詠水贈蛾眉。

楊蟠

韜光菴詩

寂寞菴前草。春深鹿自耕。
老僧垂白髮。山下不知名。

又

遊韜光詩

瘦藤拄到古韜光。分得山房半榻涼。
白髮老僧從定

起斷雲漠漠護殘香

郭功父

韜光菴詩

逢人寂無語結草自棲禪但見巖花笑雁脰不記年

僧簡公

韜光菴

洛下僧歸未寂寥餘光還向此中韜入千峯杪從他
笑放一頭低儘自高客至坐涼依樹影雲開望瀉到
江濤夜遙月冷風初霽萬籟無聲亦怒號

白珩

四月九日同友鄭左史時復策杖遊韜光池內
金蓮適開喜而賦之

閒扶玉室九節杖來看金蓮兩蒂花爲報都官莫作
異山僧不着紫袈裟

陸圭

宿韜光菴詩

雨過山頭夜氣清天風吹下步虛聲道人酒醒推窓
看月在琅玕節上明

張輅

訪韜光師詩

躡屩捫蘿上翠微。綠雲深處叩禪扉。老僧解誦香山句。驚落松花滿客衣。

孫一元

韜光夜宿詩

露下蟪蛄空砌鳴。山深不聞長短更。天風吹人酒欲醒。北斗插江湖半明。

趙寬

登韜光菴遇雨詩

層層林樾繞羊腸。千仞迴盤入上方。城市紅塵應洗盡。更教疎雨動新涼。

高攀龍

萬曆癸丑與丹陽周仲純來遊韜光靜坐三七

日書二詩以紀勝遊

偶來山中坐兀兀。二旬餘心中澹無事。宛若生民初流泉。當几席衆山立庭除。高樹依巖秀。修竹夾路疎。所至得心賞。終日欣欣如流光。易蹉跎。此日良不虛。

寄言養性者。速駕深山居。

落日在平野。悵然懷千秋。緬彼臨安區。當年棲王侯。
樓臺何鬱鬱。冠蓋紛相酬。一朝世事盡。百代成荒丘。
徒存指點迹。令人心懷憂。何如蓬廬士。偃息巖壑幽。
詩書共朝夕。花木遞春秋。觴酌洽朋好。卧起親鳧鷗。
豈不念世故。心中自有求。生有無窮娛。既沒名長留。

華亭張磻

遊韜光菴詩

結茅依長松。松濤徧幽壑。山僧何處來。坐久松花落。

又

萬山看不盡。獨樹意相親。自是東籬叟。翻來蓮社人。

又

庭前春草碧。籬畔野花紅。不語色空義。閑花芳草中。

又

山空吾自遠。僧定爾無言。坐對三更後。斜暉月半軒。

又

花徑宿煙霞。柴門來杖履。枳殼自春風。芭蕉又秋雨。

黃端伯

遊韜光菴詩

黃龍吐水響如雷。中有金蓮五葉開。堪笑香山白居易。石頭路滑上天來。

項煜

冬日同瑞星同館過韜光菴僧索題綵中見高
中丞遺句有感

巖阿絕處訪靈仙。流水聲中看遠天。烟樹無勞封谷口。千峯飛入小亭前。

山僧開篋有雲烟。高士風流共此編。三七丹成浩然去。清音如在水濺濺。

文震孟

庚午初冬獨遊韜光菴遇憑虛上人殊可與語
出冊索詩漫書一絕還當作山行記酬之

斜陽竹樹影蕭蕭。獨有幽蛩破寂寥。萬境不波心似水。滿庭紅藥映山椒。

豫章樊良樞

人日同匡山諸子集韜光菴分得山字
春迴雙樹欵柴關。勝日同人一共攀。風引磬聲花外

轉雲依泉響竹間。還僧窺蘿月。禪心冷。客醉梅花吏。
事閒清興坐深忘。漏永相將晨策更登山。

婁上王志慶

余別韜光十有六年矣。崇禎壬午年春同中表
張仲潔及天池上人同過。覺如師出素冊屬
書首葉。乃高忠憲公手筆。拜讀之。憬然不能

自己因次其韻

靈山舊游路。相違一紀餘。玄髮我已變。蒼峯宛若初。
繩床引幽夢。頓覺萬慮除。夜寒春雨來。聲雜風泉疎。

閉門便終日。塵路將焉如。於茲悟流坎。擬度還成虛。
歇狂匪慙懣。何事懷郊居。

山僧出素帙。景懷在千秋。清風自得師。塵土王與侯。
當年晏坐日。曾莫相獻酬。公心妙湛初。屹爾同山丘。
肅拜讀遺句。憬然起百憂。媿我章句士。未能發潛幽。
獨行懷霜雪。名言奉春秋。冥念百年際。聚散若沙鷗。
莫爲瞬息營。兢兢審所求。松高鶴自棲。水潔龍常留。

浮山方孔昭

壬午春日韜光菴

湖上弄煙姿。媚物際春景。遙望北高峯。喬松引深靜。
幽洞如浮山。一枝懷耿耿。泉亭面綠澗。塵色衆清冷。
譬彼臘瞿曇。迥然異妝靚。修篁藏大壑。時露江湖影。
不似堤畔青。柳蒲供繁騁。樓觀自昔詠。闕此寂寥境。
來遊者誰子。探奇當前領。

長水岳和聲

遊韜光菴詩

客來元不速。話處亦無生。湖海有如此。人情詎易平。
松分雙岫翠。月上。一尊明。錫挂巢溝暮。相思及聽鶯。

董其昌

重過韜光

兩詣韜光寺。山深日半暉。泉聲清洗耳。嵐色欲成圍。
小酌分僧食。幽心待鴈歸。吟餘高士韻。感慨淚沾衣。
雲間陳子龍

上韜光道

澄氣發層徑。午峯秀披扶。孤亭喬木下。散曠存清娛。
水澗溪尚靜。雲暝山復殊。廣堂鬱朱草。別澗生青蒲。
懸輿攀絕巘。返杖送嶮途。迭映媚樵路。虛折限人區。

幽篁叠娟姿。飛泉歷虛無。鳴鳥谷中怨。巢巖松際俱。
高閣抱雲氣。迢遞開江湖。四山聞無人。秋響相奔趨。
物慮勞光采。遐心適可符。

雲間周立勳

韜光嶺詩

一往雲昇萬竹光。樓高細靄辨微茫。空浮江白來鴻
鴈。全擁山青雜虎狼。海嶠氣涼秋大出。松亭日靜晚
逾荒。卽今天地多兵戰。極目中原未可忘。

蔣如奇

山行詩

行山豈獨鳥爲羣。又喜泉聲一路聞。野外柳花輕似
雪。株梢新色碧于雲。隣松便覺空塵相。近竹方知斷
俗氛。及過紫霞留一醉。却忘紅日已斜曛。

又重過韜光菴

不厭躋攀數。時來魚鳥情。踏林花自舞。漱石瀑還生。
月墮巖扉冷。潮添海嶼明。夜深渾不寐。秋響逼人清。
又別韜光調詩餘一闕

寒水碧水上。何人吹玉笛。扁舟遠送瀟湘客。蘆花千

里霜月白傷行色來朝便是關山隔

王三德

遊韜光詩二首

小小肩輿去招提日未斜
流泉臨竹粉甃石落松花
客少閑房寂山深古洞遮
輕雲微雨過飯罷幾甌茶

又

晚登仙閣上四望盡雲烟
樹杪懸崖出簷端好鳥還
僧能燒玉版池喜種金蓮
借問西來路雞園有渡船

霍達

韜光雜詠三首

浮塵能到此間無過眼烟雲勝畫圖
心骨冷然清絕處微茫月裏見西湖

尋山問水續前因心冷如灰多病人
半睡忽聞清梵語祇疑身是老僧身

微風動竹竹聲幽又有清泉與月流
杖策欲尋明月去不堪更上最高樓

又韜光山暮

危樓高閣並雲峯樹樹山山翠色濃
竹露早隨秋夜

月松濤先到暮堂鐘。僧能多壽因慙懶。我以清狂竟
困慵。慚愧勿談今世事。祇宜祝髮杜塵踪。

又重過韜光菴簡澄泉大師十七韻

有引

余以昔年秋杪失意南圖。鍛羽東歸。值落英之散
亂。正金粟之飄零。序與愁迎。愁因序長。抒懷不怡。
眇息生慙。偶動暮雲之思。遂啓秋山之興。桂棹潛
移。蘭舟乍泛。遠渚鷗驚。平沙雁起。南屏之樹翠迷。
空北高之峰烟蔽日。爽氣朝來。深衷可悟。晴光夜
斂。遐賞能終。爰陟茲菴。願言少憇。座臨池上。榻近

嵯邊。茶話從容。塵談精粹。師則圓通妙解。人我都
忘。余則管見株求。性靈俱昧。自斯一別。迄今經載。
業淨空門。累多塵世。猶喜湖波不改。堤柳依然。重
來路熟。歲隔林幽。山川爲感。舊之資。杖屨是探。奇
之具。觸目興詠。以供撫掌。濡毫擘紙。竊用陶情。惟
期盡意。毋顧蕪辭云爾。

曉來衝霧露。強半濕衣巾。可謂素心者。寧非避世人。
行披芳草逕。坐拂落花茵。訝此參商舊。知斯夢幻頻。
勲名勞受想。色相起貪嗔。欲了空門願。難辭骨肉親。

鋒芒從宿業。慧力本前身。麋鹿堪爲侶。烟霞足比隣。
買山資未辦。點鐵法無真。栗里問遺老。桃源見遯民。
拈花嗟倏忽。顧影歎逡巡。歲月如流電。生涯等沸塵。
觀魚消妄想。照水悅精神。竹石多清韻。雲林寡俗因。
泉聲疑暮雨。鳥語恍殘春。寒翠生遙壑。晴嵐下遠村。
相看看不厭。心賞幾回新。

再成一律爲慧光禪丈

來時不令主僧忙。布襪青鞋作道粧。雨勢却添雲壑
響。秋聲又報竹窓涼。人同野鶴移閑步。燈似流螢拂

卧床。欲與空山重寫照。窮他清夜思深長。

華亭彭賓

壬申之秋予嘗游此雨阻不得上未刻賦數言
以紀其事茲以吉明之請聊爲補作時已卯孟

秋

靈隱未爲隱。韜光不自韜。危巖歷未止。泉響方嘈嘈。
江海疑遠近。松風引怒濤。俯瞰雲樹合。不知身已高。
我來吸秋水。所遇幸羣豪。息意千峯側。回首亦陶陶。

合肥王綱

遊韜光菴

橫開一徑到山巔。拾級登臨別有天。樹杪流泉通海氣。巖邊修竹隔人烟。

京口鄔熹

韜光菴分山字

蒼蒼百畝護松關。閣俯長江白日閒。樹杪泉聲千澗落。雲中錫影一僧還。苔深曲磴疑無路。石隱重巖更有山。縱有紅塵飛不到。誰云仙境隔人間。

又晚眺分看字

返照雙林倚杖看。霏微山色逼人寒。香雲暮擁碧天近。翠靄晴開四望寬。落落危巖藏鳥道。潺潺飛瀑瀉龍湍。也知滄海無多路。只尺蓬瀛到不難。

又用空字

崔嵬細路斷還通。石笋玲瓏峙碧空。東海月生潮共白。西山日落樹交紅。

又登絕頂分二蕭

草色莽蕭蕭。泉聲度碧霄。人行千樹外。雲出萬山腰。虎蹟頻當路。虹垂欲駕橋。晴霞天末起。疑是赤城標。

又金蓮池觀魚分瀾字

可是濠梁上。朱魚好共看。浴波霞散騎。競濕水生瀾。
每自親人易。寧知出世難。悠悠緣愛爾。一日幾凭欄。

南徐蔣汝玄

韜光菴晚眺分看字

危崖獨立俯層巒。便欲乘風借羽翰。翠靄忽浮雙樹
暝。白雲深鎖兩峯寒。城連萬井墟烟直。山抱重湖夕
照殘。隱隱禪房明佛火。老僧常向定中看。

又分紅字

獨携雙屐踏芳叢。牧笛聲聲送晚風。僧磬半依山靄
下。人家多在嶺雲中。澄湖晚帶輕烟碧。滄海晴吞落
日紅。散步不知歸路暝。隔林孤柝起城東。

又分懸字

策杖憑凌紫翠巔。山光何處不堪憐。危峯晝擁松杉
日。曲磴晴盤薜荔烟。十里澄湖天外落。千尋孤壻鏡
中懸。嗟余久厭風塵色。已自皈依繡佛前。

又分探字

錢塘古寺隱晴嵐。丈室淒涼尚可探。忍草盡生諸佛

土。靈花常護老僧龕。龍銜海氣來山閣。鳥帶雲聲度石柵。倚檻俯看千樹外。飛濤高卷大江南。

婁東吳偉業

癸酉同僧彌游韜光已丑初夏重來遇慧光禪師屈指十八年矣爲賦此詩時僧彌已亾不勝今昔之感

峯斷江天豁樓高海日紅鬚眉千丈雪衣被五株松
扶杖孤雲裏開窓暮雨中聽泉還洗鉢好作淨名翁
橋李曹溶

已亥三月取道靈隱上韜光漫記一絕他日更和忠憲公詩爲山中存故事也

十年重作冷泉遊絕頂依然架竹樓
輸與道人閒坐穩春晴天濶數江鷗

海昌朱嘉徵

登韜光和白樂天刺史韻

白雲停北戶流水到西家
選石多成筭閑池早着花
磴頭懸玉李松下長金菜
貪看錢江月山僧已點茶

又

墨君非一館。碧籠出諸家。樓擁溪外竹。亭當巖上花。
區泉試團月。部畹護蘭芽。幽事留丹竈。尋雲漫品茶。
宣城孫竹

庚辰季春同武林陳芝仙過韜光賦

佛國不在西。錢王城外寄。鬱鬱岩堯過。頂作降龍勢。
大唐韜光師。生天能出世。香山作太守。巢溝萬年誌。
蓮花石笋篇。筆鋒相睥睨。鑪香大畛騰。一掌金粟地。
雲心布隱岫。歆動陸沉吏。泉弦石隙彈。禽管木陰吹。
煮井撲塵烟。聽潮鼓狂肆。曦盥巖之阿。晡曳巒之際。
忽詠賈駱詩。雲根劖古意。徐涓逼山陰。江東簽位次。
不見有替人。或犯山靈忌。時聞蚯蚓聲。攬入鳳麟隊。
海殿貢江花。淨揀意中對。離騷道德經。藏之無興廢。
編年咸和來。千劫寺中寺。

灞陵梁以樟

乙未菊月五日同東航子登韜光菴最深處留

贈慧光禪師用海先生韻

江湖海日靜中迴。菌閣閑雲鎖不開。八十四年無一
事。天風暗送木樵來。

又

靈巘夜半掌中雷。秘洞玄關未許開。欲撥黃芽爨午飯。香山重見後身來。

武原陳梁

春分後三日同行無漢先樹菴韜光春雪和高
景逸先生詩

春光今過半。灑雪若冬初。種蓮存古跡。妙處在蕭疎。
碑字依稀數。僧閒八十餘。不須多日住。已覺萬心除。
友昆原不惡。信宿諒無虛。憺忘宜此地。何用買山居。

山泉如晤語。竹栢影如如。

益都孫廷銓

遊韜光菴

半巖修竹晚烟橫。山意僧心託寺名。看盡西湖千頃月。爭於枕上聽泉聲。

三原張璿

次前韻

倚樓觀日翠嵐橫。異草珍禽不識名。半幅雲烟天外落。谷深空響入溪聲。

徐 汧

戊寅辛巳及今歲三至虎林必留連韜光菴茲
慧光師出詠冊索題見高忠憲及吾亾友王孝
廉詩走筆書此時甲申三月七日

二首

虎林巖水苦填咽每愛幽深向此間車馬繇來厭岑
寂韜光二字也須刪

七年三至巢溝塢竹色泉聲白傳詩今日留題更懷
舊鄉先生句故人詞

米萬鍾

初春遊韜光遇雪

東風掀簾月皎皎五花剪春雲葉小爐紅杯煖詩欲
成韻客正來梅正好

華亭沈龍

春日遊韜光

風幃垂雪嶺香好閉龕焚鹿踏溪頭月泉翻樹頂雲
山空松響合花亂藥香分何處啼晴鳥支筇林外聞

曲阿賀烺

集韜光菴兼訂掩關之約

磴曲峰盤萬木翔。湖光海氣接蒼茫。雲携鳥影投空
谷。竹引泉流出上方。塵夢十年初喚醒。浮生半日已
清涼。經函佛火欣相傍。分得池蓮幾瓣香。

晉汾朱之俊

宿韜光菴同公亮作

阿曲遵塗遠。巖空積樹危。疊臺侵石骨。架塔暗禪枝。
竹窅泉聲細。林深磬響遲。青川千里目。綠嶂百重思。
海月江心動。松風麥壟吹。蒼烟隨谷長。碧葉倩雲滋。
溜滴多新致。人來非昔時。凭高僧氣盡。坐久道心基。

銀燭消殘。唄金蓮。冒小池。山將情共寂。莫謂有文移。
齊琦名

秋日同友遊韜光

躡磴攀林此共君。元壺蘭若挹清芬。苔封深澗秋常
寂。風咽疎鐘午不聞。枕竹遠支千澗水。結樓高倚萬
松雲。從教酒戒山僧破。緩酌清言坐夕曛。

淮海厲士貞

韜光夜坐

曲磴隨溪折。崖高衆勢供。泉聲不斷壑。樹影若連峰。

石靜留雲宿。樓虛待月封。清心忘就寐。松響入山鐘。
又和白香山韻

竹樹盤紆徑。羣峰擁一家。雲生迷石磴。風遠泛松花。
載酒尋山菓。呼童掘笋芽。月光如水白。掬飲不須茶。

李芳春

遊韜光菴

危亭海氣直。飛來點點江。帆出斷崖一。匝光收千里。
意神山十二鏡中開。

張鳳翔

過韜光禪院似慧如上人

雪髮霜髯白橘皮。虎溪風味古人期。不關家國興亡
變。獨愛山泉歲月遲。惟石千尋標勁骨。閒雲一片寫
幽姿。松聲半榻清如許。偶爲分齋話幾時。

唐玉

宿韜光菴次王百穀壁間韻

古梅翠竹澹氤氳。隱隱鐘聲樹杪聞。石隙靈泉翻法
雨。堦前芳草帶慈雲。三山漂渺金輪轉。山頂觀二水
日出處微茫白練分。山望見西
湖錢塘江信宿幽情還未厭。徘徊霽景

又餘燠

曹谷

遊韜光菴

竹籟松濤覆古菴。憶前三過十三年。老僧面目猶如舊。擬借繩牀聽鳥眠。

吳興李焮

丁酉初秋遊韜光

名巖蒼翠鬱重重。石戶天梯雲半封。海外金光浮黍米。山前紫氣列芙蓉。垂珠絕壁藏神虎。飛雨澄潭起

伏龍。靈鷲峰頭回首處。風塵空眼擴襟胸。

錫山秦松齡

遊韜光菴

復與諸山異。茅蘿一徑通。鳥歸孤寺外。人在百泉中。竹密亂生綠。林疎間落紅。坐來殊自失。何處置微躬。

潤州笄重光

遊韜光菴

探幽策危磴。石頂得寒泉。坐對不能去。身世兩悠然。

邵彌

癸酉春偕禹玉駿公諸君過韜光訪憑虛開士
茗次爲書言索粲

飛磴壓湖汜。真搜到此家。弱藤扶曉壁。寒竹碎晴堦。
雲捲龍腥鉢。僧孤鳥趁齋。無言幽冷態。林下忽山排。
天心子

遊韜光菴二首

遊興當從秋日好。三年秋半到杭州。行行共入韜光
去。萬樹幽香映小樓。
林深不必掩柴關。水遶山迴獨自閒。靜侶相邀來古

寺。老僧笑指隔江山。

秦汧

予年癸丑生。今來步祖舅忠憲。癸丑年韻南北
易都世事大異。可傷悼也。

適來值新霽。晚霞留日餘。暮山看不足。恰當明月初。
松筠爲蓋幕。江湖卽庭除。浩然四高空。方知世網疎。
悵悵夜無燭。環顧將焉如。不置山嵐間。此生終日虛。
七日四歲僧。樂哉久安居。

天下方離亂。世事已交秋。擁兵稱吾雄。誰爲投筆侯。

豈無國恩在爾功不爾酬杳邈西北隅何人守帝丘
生年四十餘既已老吾憂除是目前真明昨事皆幽
年光復五十歷歷春再秋避亂多一身孰者輕如鷗
但得如老僧此外吾何求高山松青青永古無去留
華亭陳增遠

巳卯孟秋同友遊韜光菴

憑高黛影合俯視萬物真江海弄秋色羣峰自清新
登臨懷古道晤賞豈無因所以天下士相逢如飲醇
形骸無復意不知何代人良會偶然遂忘歸可經旬

方尋山下路耿耿歎風塵

山陰王紹隆

登韜光菴

峰迴途未阻溯澗上危巔嵐氣結深竹湖光挂遠天
岩阿逢積雪樹杪見流泉縹緲思無際凌虛人欲仙
海上朱用櫟

乙酉三月遊韜光菴

老僧逢竹塢結宇最高巔躡蹬梯雲絕推窻得樹連
半空飛法雨千澗響寒泉我有名山約韜光與作緣

山陰錢受益

戊辰仲冬同項水心遊韜光卽事

積雨推遊興登臨及小晴嵐開羣樹出湍響衆山鳴
江水雲間起湖光竹外平偃橋虹屢飲蹲石虎如迎
衲子渾如舊神仙若可成扶携行碧落憇息坐青城
更上奇難盡盤旋趨轉并悵然天欲雨啜茗說長生

鄺南許作梅

遊韜光

石磴盤雲窟登臨眺海天那堪左掖客來對北峰禪

林密山藏寺巖高竹引泉境幽人不到猶見老僧賢
朱鳳生

宿韜光菴阻雨

拾級尋幽徑緣溪渡石橋白雲迷列岫丹閣出層霄
霧色籠春樹風聲送夜潮醉眠渾未覺窗外雨瀟瀟
余謚

遊韜光

塵襟掃淨到山扉霧鎖層巒雨正飛日暮江城歸路
晚松風歷歷拂人衣

方猶

丁酉十月十七日友人陸鹵書舍姪玉宗靈隱上人月巖亦在遊中法戰偶勝意欲出居士一頭因作觸步二語記其事他日重遊未可知也曉起不辭慵高樓撞曉鐘招邀尋勝蹟落拓寄孤筇曲徑晴如雨寒岩夏已冬泉聲飛百道日色散千峰觸步猶知路乘言敢會宗道人幽興足二客尙能從

釋悟武

戊子六月同遊韜光作

倚步沿流至窺門借竹陰境窮偏得憇機到却成吟
剝啄人非別寒暄意自深會知千載事灼灼在東林

晉江蔡茂華

登韜光作

龍泉鳴法雨山樹靄斜曛何代通幽徑誰爲掃白雲
青精猶可飯釋子亦談文丹灶黃金冷高松鶴不羣

閔敬生

遊韜光

幽情隨野客縹緲泛僊槎深樹疑來雨空山半落花

看松泉有夢。問石酒爲家。以此延秋况。蕭蕭天一涯。
會稽徐行

遊韜光

寓公携我叅三竺。借泛西湖一葉槎。窮壑穿雲迷鳥道。梯山曳杖過僧家。泉聲滴瀝禪機寂。樹色青葱飲興奢。醉臥渾忘塵世事。疎鐘喚起飯胡麻。

愚公谷

崇禎元年三月上浣日題

三月桃花盡水流。冷看積雪在僧頭。問年八十猶添

一笑我知非過昨秋。

古浣顏渾

遊韜光

舟行復乘月。遙睇綠溪陰。鷗鷺忘機久。雲山抱癖深。未能馴野性。聊不負閒心。唯有西湖夢。時時到武林。

杭州沈捷

登韜光追和高忠憲公二首

結伴巖上宿。夢魂恬有餘。曉起更清曠。再逢開闢初。振策登危峰。緩步如堦除。巉崎六七人。高下密復疎。

三休竹樹間。共笑畫不如。廓然至其頂。仰觀親太虛。
歷覽不能去。歎息難久居。

開帙遇前輩。慄然悲九秋。先生不朽人。腐鼠嗤公侯。
矢志踵其韻。高言誰能酬。今日復何比。社屋齋蒿丘。
異代嗟興亡。何如身世憂。乾坤一漆室。俯仰白日幽。
館結二三子。登眺延窮愁。先生重一秋。我師佛圖澄。字僭易之。
狎虎如狎鷗。何必去五嶽。目前縱所求。當年三七日。
鴻名千載留。

又追和王六瑞先生一首

鷲峰分一折。山勢遂深韜。竹樹凌空下。雲泉落礫高。
黃旗瞻海日。白馬辨江濤。緬想拈糕客。留詩讀更豪。

陳紹英

登韜光和高忠憲公原韻

相與共氣理。山川供嘯餘。晨遊益蕭遠。宵然窺太初。
升高足忘疲。轉覺景卽除。分坐倚林密。延眺從竹疎。
羗獲似當年。進止咸自如。咳唾凌天風。意象乘空虛。
發筴告山靈。雅志圖卜居。
老僧出縹帙。展對多春秋。中有高先生。洒筆輕公侯。

俯仰惜前代。竟與身世酬。使我更搔首。幾于亡家丘。
吳景夢日觀。滄海沉私憂。撫案忽惻惻。賦懷恒幽幽。
泉石如鑒人。磊落爲破愁。原重秋字大匡爲易驚叫聞霜鴻。狎
盟隨水鷗。我行誠鹿鹿。於世希所求。寄言此山中。花
木應好留。

柴世堯

登韜光和高忠憲公韻

結趨在山水。何待歲月餘。丹楓映碧巘。乘此佳候初。
杖策登崔嵬。觸景俗念殊。明湖遙靄接。深竹曉風疎。

紆迴望懸磴。攝衣縱所如。憑眺絕飛鳥。邈焉凌太虛。
安得棄塵世。卜築僊人居。

層崖隔人境。不知春與秋。山林可狎長。醉鄉足稱侯。
何爲苦逢世。汨汨淪獻酬。壁觀有老衲。雲臥恬高丘。
恒見海日起。亦無風雨憂。木落空山冷。泉浮翠苻幽。
我來憇池上。一啜已酒愁。結侶招野鶴。忘機任海鷗。
詠題舊盈帙。載披獲所求。先哲誰繼響。勝情藉以留。

關鍵

登韜光和高忠憲高先生韻

水筒接紆徑。懸磴百尺餘。重來訪韜光。時惟丹楓初。
寒葉嫋未脫。宿草闇欲除。俯檻江湖開。豁然心目疎。
五十未棲山。慚愧鹿不如此。上有幽靈宅。長鎖松竹虛。
老衲坐清湫。問我何居居。

肅肅天竺頂。四時成古秋。所至澹若失。何論新故侯。
青雲滿瑤笈。觸感興唱酬。穆穆松下風。鬱鬱原上丘。
正士多苦辛。烈懷湛壯憂。天問賦招魂。寄意何陰幽。
國步經蕩析。余生畔牢愁。城頭連虎尾。敗蘆藏汎鷗。
繫此物外區。堪向山靈求。朋儕指去途。默坐欣還留。

鄭賡唐

登韜光和高忠憲公韻

疊疊峰峰異。北高尖削餘。巖巖崇雲簇。丹碧葉戰初。
我昔躡屐至。日月幾乘除。今偶良朋屢。依棲竹影疎。
烟道望不極。江湖僅帶如。罡風衝白熈。追逐在空虛。
僊窟鉢龍在。却羨老僧居。

瑯臺鎖蘿幌。靜古自然秋。嶽德雖謙抑。不似東陵侯。
雲貯高人筆。琅玕咽唱酬。屈軼初善指。金鼎重山丘。
葵恤當孔棘。蚤懷叔世憂。景光修蛇尾。所貴枝撐幽。

花間午時梵。藉草一沙鷗。累石同人拜。剝落尙可求。
落葉空山句。應與此山留。

轅里王士祿

遊韜光用關六鈐韻

峇。堯。靈。境。愜。探。尋。徑。轉。時。聞。谷。鳥。吟。厨。溜。引。泉。衝。澗。
過。齋。鐘。出。寺。到。山。深。飛。飛。戲。蝶。拍。荷。葉。颯。颯。鳴。蟬。散。
竹。林。司。馬。游。來。成。倦。客。一。椽。還。擬。寄。幽。岑。

黃山孫默

和前韻

念載韜光未易尋。重來莫憶舊時吟。江湖極目紅塵
近。僧舍留人白日深。坐遠只聞一鳥語。徑幽盡是萬
竿林。留連直待斜陽去。雙塔裴回第幾岑。

當湖陸光旭

遊韜光和黄海岸先生韻

青山有約共宗雷。峯對蓮花僊掌開。爲與老僧曾說
法。三生石上又重來。

揚州汪懋麟

坐金蓮池上二首

春去才逢一日晴。深山四月喜聞鶯。忽來小閣驚飛
雨。却是山泉滴瀝聲。
韜光絕壁好禪關。今古遊人自往還。何事題名留片
石。高吟只數白香山。

櫟下周亮工

獨過韜光

寺裡登山去。韜光景色偏。空林無垢葉。絕巘有清泉。
此地真岑寂。看人自往還。蕭然茶話後。吾意已逃禪。
會稽姜希轍

丙辰秋日用白香山原韻

問山臨絕壁。幽趣在僧家。半檻雲飛石。方池水噴花。
丹楓初受日。翠竹漸生芽。靜業渾無事。籬邊閒種茶。
虞山錢朝鼎

壬寅五月遊韜光次前韻

曉月橫飛屋角泉。扣門驚醒竹廳眠。樓高霧擁扶桑
日。鉢冷晴生火宅蓮。縹緲鐘聲聞下界。參差樹影入
遙天。當年雙桂雲皆老。彷彿飄香到枕前。

宛陵施閏章

韜光寺同白香山韻

丹閣僊人宅。香臺佛子家。嵐深晴作雨。樹老晚成花。
礪口齊藤葉。牆根過笋芽。聽泉從日暮。自煮白雲茶。
又宿飛雨閣用韜公韻
高僧卓錫繞清泉。逋客擔簦登峰頂。眠古桂。雙株棲白鶴。
寒池十丈長青蓮。茫茫滿壁雲生榻。渺渺懷人月在天。
不信飛僊吹鐵笛。窟龍驚起石樓前。

海昌楊雍建

遊韜光次白香山韻

積雨天山合。雲封高士家。泉流飛古雪。梵靜散天花。
破壁龍藏首。懸崖石吐芽。那能邀白傅。重與論新茶。

又

直上層巖路。還登百尺樓。白雲滄海合。赤日大江流。
竹韻泉根遠。楓聲蓮嶠秋。玉僊如可下。勝地若爲酬。

錫山顧鏞

丁未春仲和白香山韻

樵居飛錫日。到處卽爲家。泉是山中水。蓮非世上花。
巖高獅子石。林長窟頭茱。拂石逢僧話。如烹齋罷茶。

山陰祁豸佳

遊韜光題壁

西崦茶塢有人家。雲抱青山。水抱沙。記得春深無限意。梅花落盡。又桃花。

武塘魏學渠

乙卯中秋前四日過韜光

忽聞香氣自空來。細雨輕風。掃碧苔。籟息泉流人太古。不知湖海。到胸開。

太守淮安稽宗孟

丁未五月過韜光禪室聽泉索句漫留口號二首

鷺嶺千盤竹樹幽。到來五月靜如秋。神州霄旰無雷雨。何事空山日夜流。

木然相對立閒閒。半壁烟霞太古間。我自留題傳勝事。莫教人說白香山。

稽永仁

庚戌寒食前六日偕游韜光和香山韻

竹路循危磴。神僊此是家。池流千古雪。山放九秋花。

撥草尋苔碣。支筇觸笋芽。因僧聊借憇。還試早春茶。
易祚昌

坐金蓮池上作

乳膏滴碎石。琅玕留得禪心分。外寒尚有金蓮開。未
老秋來采實合成丹。

蕪門孫爾遇

和林雲木先生遊韜光詩韻

竹自參天泉自佳。見聞俱寂復何加。白雲非主余非
客。瘦盡山僧老盡花。

錫山陳典

登韜光

躋攀不惜路重重。尋勝韜光第幾峰。寺築雲根通古
澗。鐘傳天半落長松。江湖漠漠帆檣小。城闕重重烟
雨濛。幾許清吟山色暮。武陵佳勝亂雲封。

巢村稽永翼

遊韜光

地勝金蓮出。韜光古佛傳。竹根欺墮石。花葉濺飛泉。
江海觀俱大。登臨興較偏。遲迴尋鷺嶺。雲在衆山前。

山陰何兆魁

次白香山韻

探奇乘興發。曲折到僊家。亂竹空啼鳥。蒼苔剩落花。
泉流心較靜。春動草萌芽。讀罷香山句。山僧供笋茶。

天都方寅

和香山韻

消盡人間想。深山卽住家。制龍供水。化鳥重蓮花。
逕破雲來補。藤枯雨發芽。忘機疎禮節。泉汲當新茶。
茗上潘曾潤

過韜光次繆歌起韻

遠寺疎鐘隱。晴嵐入望幽。聽泉疑是雨。坐石不知秋。
月映溪山翠。雲開麋鹿遊。我來尋勝地。何處覓丹丘。
東吳朱之稼

次香山韻

爲有離塵思。來過雲水家。飛泉鳴石磴。法雨散天花。
玉版方穿路。金蓮初長芽。坐深忘去住。頻啜紫茸茶。

沈傳曾

和香山韻

踏泉尋起處。轉磻至僊家。道洽三同契。心開一地花。
應門頻掃葉。種竹任抽芽。有客來匡坐。山僧試煮茶。
燕臺侯之桓

集韜光分賦

草色暗斜陽。飛花拂袖香。寒巖千竹翠。石徑一松蒼。
嶺斷雲分出。沙明雁逐行。客來山閣望。秋雨送微涼。
甬上董道權

乙卯秋日過韜光作

茫鞋不倦此躋攀。收盡湖光十笏間。曉閣紅瞻遙海
日。晴窻青見隔江山。荒臺踪跡僊人杳。叢桂春秋衲
子閒。誰繼梁溪司馬後。寒泉聲裏閉松關。

魏坤

遊韜光二首

仄徑迂迴鳥道難。捫蘿雲氣出千盤。雨中倦策峯頭
坐。閣上憑虛樹杪看。絕澗瀑侵苔磴濕。桂枝香護竹
扉寒。僊祠縹緲瞻遺像。鶴背風高鐵笛殘。
羣公佳句足淹留。更躡丹梯到上頭。萬壑烟雲迷鷲
嶺。一天風雨下龍湫。濤聲勢挾江城動。海色晴連越

嶠浮東望扶桑蓬島近。飄然身世泛虛舟。

吳門褚 篆

甲寅春暮過韜光菴

白石野樵路。蒼筠衲子家。高寒樓供日。寂歷水流花。
古澗藏雲液。深林長露芽。坐沉因惜別。時啜遠公茶。

吳門孟亮揆

甲寅春日過韜光次韻菴韻

百折盤雲磴。香林入竹幽。到門聽瀑雨。憑石瞰江流。
地僻松杉老。山寒猿鶴愁。春芳雖未歇。詩思已含秋。

月槎主人張劬

登韜光偶成一律

樹杪窗開古佛樓。杖藜到處野雲稠。鳥窺人靜將偷
飯。龍爲池清也幻遊。泉嚮不妨僧入定。山高好傍月
爲儔。尋幽偶步韜光寺。始識西冷邁九州。

葯園丁澎

和白香山寄韜光禪師原韻

春深訪蘭若。隨意到山家。洗鉢泉穿竹。談經雨散花。
晶鹽和筍味。松火瀹蒿芽。香積勤齋供。瓶罌滿貯茶。

和韜光禪師荅香山原韻

古院嚴扉扃石泉。鄴公房裏正安眠。薔薇亦是祇園樹。咋嶸爭如泰華蓮。載酒應過黃鳥候。尋春辜負綠楊天。風流刺史誰堪繼。肯醉詩人白社前。

古豐季之翰

遊韜光菴

巢塢深藏不記年。到今却使倚人傳。松篁過澗思吞壑。磴道穿雲勢接天。僧爲棲虛常避世。客因卜地一逃禪。當窗坐久忘歸去。更訂重來信有緣。

吳門王逢禱

韜光聽泉

香樓百尺聳層空。樹杪飛泉聽不窮。豈有天花來鶴駕。却流霞液到龍宮。江聲直接澄湖外。海氣遙連夕照中。坐久塵襟應滌盡。何須半偈問韜公。

德水蕭惟豫

癸丑同繆念齋遊韜光口占一律

寺居絕巘遠塵氛。我愛韜光祇共君。隨手杖扶山徑竹。回頭履躡澗溪雲。翠封千岫松杉合。波湧一江吳

越分把臂登臨渾不倦。泉聲到處耳邊聞。
龍眠方膏茂

獨遊韜光

徑轉青雲外。光韜隱法幢。竹深人跡暗。僧定虎心降。
樓日先滄海。山潮湧浙江。閒情扶遠策。永晝坐西窗。
再遊韜光

重來方丈地。苔磴傍崖懸。丹樹繁霜後。朱欄佛日邊。
泉高喧碧嶂。池暖泛金蓮。別去纔彌月。雲山更一天。
婁東沈受宏

癸丑夏五月九日同蕭韓坡繆念齋兩太史登
韜光觀白太傅與韜光禪師寄答詩賦此示山
止上人

韜光住靜白公閒。想得詩筒愛往還。舊事古今成勝
蹟。寒泉日夜響空山。路穿萬竹客登寺。窻對一潭僧
閉關。碧海滄江都在眼。茫茫此下是人間。

甲寅春暮遊韜光遇雨

雨濕北山頭。蕭條不可留。午陰隨作暮。春冷忽成秋。
雲合千峯起。泉分百道流。回看蒼翠裡。幾處是曾游。

又贈山止上人

韜光卓錫處。千載繼孤蹤。閉戶向春嶂。吟詩消夜鐘。
江聲高聽小。海色遠看濃。相送下山客。蒼蒼烟幾重。
丁巳臘月韜光重晤山止禪兄自甲寅之春別
四年矣同遊者隨菴頴菴兄弟也

別師松樹下。烟月幾年過。四海亂離久。一身飄泊多。
空山消客話。落日起樵歌。坐讀新詩好。石床深薜蘿。
癸亥五月三日同次谷過韜光留題

我從此地尋精藍。幽勝最愛韜光菴。泉聲竹色轉曲
磴。絕頂一望窮東南。湖作杯盃孟。江作帶。諸峰雲氣相
吐含。鷲嶺却在山脚下。濃青萬樹浮烟嵐。快哉高閣
豁窻牖。仙竈遺蹟同禪龕。菴中上人我舊識。彈指十
載過門三。老者修髯致瀟洒。少者騷雅頗足談。我來
蔬笋轍具飯。所喜有酒仍芳甘。空囊那得金布地。破
費香積殊懷慙。此別匆匆適閩粵。炎天遠道愁難堪。
回思靈山隔塵外。清景月嶂兼風潭。明年定期襍被
到。坐臥十日依瞿曇。

丁巳嘉平遊韜光作

攀蘿探絕勝。高視極長空。海色晴嵐外。江流宿靄中。
竹深千嶂靜。寺遠一泉通。輸與棲禪客。清吟思不窮。

早登韜光

晨興禮瞿曇。縱步探幽景。寒裳躡雲梯。策杖躋松嶺。
干霄竹萬竿。蒼翠接峰頂。草際露濡衣。山花雜野菌。
朝曦出林梢。石崖見人影。地高襟自舒。境曠目可騁。
江山互回抱。湖光碧千頃。入戶宵無聲。佛燈常耿耿。
衲子懽相迎。閒房坐烹茗。臆虛飛鳥過。堦淨流泉引。

塵懷覺漸忘。幽趣偏獨領。談罷一聲鐘。泠然發深省。

婁東王 攄

遊韜光

寺樓隱隱白雲隈。坐聽松風萬壑來。地盡一峰江忽
出。天清諸嶺海方開。深林鳥嘯時當戶。曲沼魚行故
繞臺。正欲烹泉留客話。湖中歸棹暝烟催。

王曜升

癸亥端陽前三日同沈台臣遊韜光

曲折循危磴。山腰古殿開。一窻收瀲灩。三面抱崔嵬。

竹色侵衣冷。泉聲觸石哀。相携探舊蹟。兼訪贊公來。
丁卯秋重過韜光

悵別山中久。扶筇覓舊踪。叢篁千折磴。古院一聲鐘。
酌水瓢初借。捫碑蘚半封。金蓮池畔吐。燦燦爲誰容。

顧豹文

同星叟遊韜光作

化域東溟接。仙宮北極間。平鋪羅刹水。雄據武林山。
碧澗高仍住。丹梯渺莫攀。霜鐘寒帝座。雲杵鎮人寰。
白芋堪孤臥。青松亦駐顏。石梁橫月窟。斗宿值天關。

江影清三折。峰光耀九環。盤空迷羽節。倒嶺墮烟鬟。
百道流皆泚。千林葉並刪。神龍應嘯去。野鶴忽飛還。
虎穴陰崖遍。龍湫古木間。傳聞丹鼎在。携劍入朝班。
吳農祥

同顧且菴遊韜光作

初地雲霞麗。諸天景物遙。樓臺橫紫府。鐘鼓插丹霄。
泉響疑飛雨。風輕易應潮。金仙仍築錫。玉女合吹簫。
海色迷江界。湖光換斗杓。聽來塵網靜。坐久劫灰銷。
城郭浮空闊。川原隱動搖。松高皆化石。竹險不成橋。

驚鳥迎扶杖。游魚喜挂瓢。天花危磴落。仙樂寶幡飄。
發興知瀟洒。羣賢愛寂寥。駱丞詩總健。白傳語尤超。
水挾紅輪入。山如紫蓋朝。從來多逸士。真欲訪漁樵。
韜光故有明。高公攀龍舊。題詩最古雅。問之爲
人竊去真蹟久矣。又賦七絕二首。
欲謝浮生此索居。依然翰墨照庭除。十年箕尾乘雲
客。不遣山靈護素書。
彈指風塵易古今。九原碧血也難尋。江湖大有賢豪
在。識得當時未死心。

戒山卻遠平

韜光寺由靈隱山門之內右轉而上。舊名韜光。
菴。唐白傳詩所謂兩寺元從一寺分者也。頃余
寄跡湖莊。就近登陟。其處風肅天高。一望空濶。
覺海雲江漚舄間可接。因思駱丞在靈隱有樓
觀滄海日門對浙江潮之句。世人各以臆解大
約不考厥原始流連斯景之故耳。爰賦數言書
諸山止禪友方丈以志勝覽兼破後來者之惑。
時康熙丙子冬仲二十有四日。

鷲嶺磴道紆。勝引厲高足。朔風振林臯。衆木落解藪。
顧盼左右殊。好景紛刺目。深探不知疲。紺宇當前矗。
境地敞崇鬼。胸懷盪清淑。層軒憑危欄。萬頃如一幅。
海東蒼茫茫。騰掉動朝旭。雲霞互掩映。水天迷斷續。
鴻濛吞江流。威迤到山麓。有時怒陽侯。長鯨翻湓浴。
雷鼓轟禹門。銀浪排雪屋。東南稱巨觀。古今標嘉躅。
溯洄裳欲褰。俯視手可掬。循覽念昔人。得句迴恒錄。
少見多所怪。臆辭同道策。千載去已遙。誰留面相告。
竭來滌煩襟。陳篇聊展讀。真詮良在茲。會心敢云獨。

婁東王 揆

甲寅春暮登韜光菴作

汨汨泉聲咽。疎篁滿徑幽。置身孤嶺上。極目遠江流。
海色連諸浦。山光盡一樓。茲遊驚絕勝。欲別重淹留。
丁巳冬日重遊韜光晤山止上人留贈二首
一別韜光又幾年。泉聲竹色自依然。憑欄極目千山
外。滄海澄江共碧天。

翠靄重重小院深。把君詩卷滌塵心。何時借榻松窻
下。剪燭清宵伴苦吟。

石門勞之辨

遊韜光金蓮池

勝地風塵絕。逍遙此日臨。洎魚時出沒。風竹任浮沉。
曲澗驚花落。危橋怯水深。秋心方寂歷。谿午得鐘音。
龍眠方雲駿

丁巳秋九月遊韜光偶成一律

迴廊穿小逕。幾曲上韜光。竹裏泉聲細。巖頭花氣芳。
潮平江遠近。日淡海蒼茫。獨鶴秋空唳。仙蹤落羽黃。
泉漾金蓮影。門閒老桂枝。曉鐘分鷲嶺。夜雨響龍池。

僧定茶初熟。窻虛雲半垂。忘機看筆墨。開卷一題詩。

方育盛

過韜光

欲上韜光逕。巖頭人適逢。坐移雙樹影。話盡隔年蹤。
客路慚僧臘。春山看暮鐘。過溪遊再訂。回指北高峰。
又辛亥秋偶題

不到西湖二十年。韜光山色舊依然。桂花香映金蓮
草。靜對方池愧冷泉。

海陵張琴

癸丑冬日登韜光用白香山韻贈淨華上人
嶙峋尋絕壁。竹裡得僧家。雲宿飛僊閣。烟迷天女花。
清池沉樹影。僻徑繞藤芽。惠遠心無着。閒烹活火茶。
和施愚山前輩宿飛雨閣用韜公韻
韜公蘭若傍飛泉。有客曾來數日眠。席上看雲時碍
竹。峰頭得水自生蓮。樹深如隔千重雨。心近應疑尺
五天。多少名山僧獨臥。幾人題詠石池前。

雙泉繆彤

癸丑夏五遊韜光觀泉之作

潭影當窻靜。泉聲入竹幽。晴時常帶雨。夏日竟同秋。
花有金蓮放。魚多赤鯉游。香山詩句好。讀罷向林丘。

苔水潘孟瀾

過韜光次繆歌起韻

爲訪韜光勝。山幽興更幽。泉聲晴亦雨。竹響夏常秋。
樓閣還宜畫。雲霞好共遊。此中多異蹟。容我嘯林丘。

錢有焜

中秋宿韜光步繆念齋韻

絕磴雲邊出。孤亭天際幽。蛩聲紛入暮。蟾影迥當秋。

羽客何年至。仙壇此夜遊。崎嶇緱嶺上。彷彿倚嵩丘。

張泌

遊韜光

清秋江霧歛。採藥到山陂。細草承溪雨。閒禽下竹枝。
人來俱愛石。僧定爲催詩。坐待樵歌歇。諸天月上時。

登韜光

高步涼秋曉。披襟曲徑迴。雨餘層嶂潤。木落大江開。
小飲留丹壑。長吟破碧苔。足音穿徑響。沽酒老僧來。

朱曉

登韜光

林深尋不到。一徑傍雲開。空翠沾襟袖。天香落酒杯。
游魚穿澗入。狂客放歌回。莫便悲嘹唳。風濤鼓石雷。

秋日偕友登韜光

亂雲迷石磴。百轉到香臺。寒瀑龍飛雨。懸崖笋破苔。
海風吹月上。江火帶潮來。我欲長留此。呼朋臥草萊。

益州費密

宿韜光觀諸公題詠因賦此詩

携手上孤峰。輕烟翳翳從。水筒秋換竹。山閣夜聞松。

先輩遺文在羣公逸興濃。幾時罷樵採樹底鬱殘鐘。
張丹

和香山韻

誰云遠公室已是列仙家。古洞泉疑雨遙峰石作花。
谷烟疑翠靄霜樹發紅芽。只此多清味何須更煮茶。
會稽姜奎

已未暮春遊韜光書贈山止上人

山僧耽奇僻論詩尙三百。吳綾卷帙多標題盡詞客。
憶昔過圓廬止有清猿躑登臨湖水平聽泉山澗窄。

萬木吼松濤片雲舒朝夕忽忽十年餘。乃見連城壁
山林不可狀下里羞圖籍相期結蓮社爲君謝遊屐

王原祁

遊韜光贈山止禪兄

捫蘿歷磴倍添幽乘興還須到上頭竹樹半分雲外
去江湖一望閣中收山僧欲話當年事刺史空傳昔
日遊爲愛巒光應惜別愛君佳句更淹留

趙貞

過韜光奉贈山止師

住山人在最高峰。磴入蒼雲踏萬松。危石咽泉堪醒
耳。明湖懸鏡獨當胸。客來偶證拈花偈。茶熟初聞出
定鐘。爾自忘言余欲去。不須重與叩南宗。

毛師柱

戊辰二月四日遊韜光賦贈尺玉山止二上人
何處尋韜光。蕭蕭四山竹。竹筧通流泉。縱橫遍崖谷。
沿緣陟層磴。山腰得茅屋。湖光出松頂。江海俱在目。
羣峰聳靈鷲。鐘聲殷林麓。乃知所歷高。萬象供遐矚。
入門淨灑掃。禪棲養幽獨。山僧出詩卷。妙語奪山綠。

窓扉對泉澗。方池浸寒玉。傳聞金蓮花。不染汙泥濁。
碧天明月句。莓苔壁間讀。身老始來遊。平生願亦足。
不恨入山遲。祇嫌出山速。爲愛遠公蓮。茲遊或當續。

婁水顧梅

○登韜光賦贈尺玉山止二上人

躡屐攀危磴。禪扉出杳冥。江橫一帶白。竹裏四圍青。
倦足貪僧話。疎泉慣客聽。登臨得慧遠。相送下前堦。

陸寅

遊韜光

茅屋松風裏。幽棲自不羣。庭昏晴亦雨。幽靜晚生雲。
妙理無言得。名香盡日焚。欣然一相對。頓欲謝塵氛。

韜光曉起

偃臥香臺下。披衣曙色中。烏啼山樹曉。日湧海門紅。
宿露凝寒石。晨鐘度遠風。蒼茫烟霧外。殘月挂疎桐。

顧永年

遊韜光

登臨來絕頂。憩足此啣杯。鳥道千盤上。秋江一面開。
松深潛佛閣。溪曲抱山隈。日暮悲笳發。狂歌且未回。

王原祈

春日至韜光遇雨

鷺嶺幽棲澗。戶扃重來恰。值雨初零倚。欄煙鎖平湖。
白躡磴衣沾絕壁。青蓮出清池。穿石竇泉流密。竹到
茶亭碧。天明月高風在。可有香山此再經。

王奕清

遊韜光遇雨

冒雨尋蘭若。躋攀倦不辭。江光烟外合。山勢霧中奇。
借竹疏泉脉。繞山皆用竹引泉移蓮浸石池。醉餘披卷帙。動

茅屋松風裏幽棲自不羣庭昏晴亦雨幽靜晚生雲
妙理無言得名香盡日焚欣然一相對頓欲謝塵氛

韜光曉起

偃臥香臺下披衣曙色中鳥啼山樹曉日湧海門紅
宿露凝寒石晨鐘度遠風蒼茫烟霧外殘月挂疎桐

顧永年

遊韜光

登臨來絕頂憩足此啣杯鳥道千盤上秋江一面開
松深潛佛閣溪曲抱山隈日暮悲笳發狂歌且未回

王原祈

春日至韜光遇雨

鷲嶺幽棲澗戶扃重來恰值雨初零倚欄煙鎖平湖
白躡磴衣沾絕壁青蓮出清池穿石竇泉流密竹到
茶亭碧天明月高風在可有香山此再經

王奕清

遊韜光遇雨

冒雨尋蘭若躋攀倦不辭江光烟外合山勢霧中奇
借竹疏泉脉繞山皆用竹引泉移蓮浸石池醉餘披卷帙動

我白雲思

韜光紀遊集家君視學時捐俸助梓故云

丁丑春遊韜光返寓閱二日山止禪師寄箋索題

再賦

數椽小築傍岩扃。夾路幽篁列翠屏。風急瀑添千縷白。雲濃山失萬重青。景逢奇處詩難寫。話到深時酒易醒。惜別再登峰頂望。江湖一抹雨溟溟。

湯右曾

丁丑三月二十一日晚過韜光禪院

澗橋徙倚老松根。蕭蕭巖扉寂不喧。坐覺清風生石

壁。行窮修竹見山門。依依烟郭江光繞。點點林鴉海氣昏。却怪白沙春漲濶。游人指點說潮痕。

一京江王廷擢

丁丑春杪遊韜光遇雨

不憚登臨倦精藍。暫息肩小窗依絕壁。修竹夾流泉。縹緲雲山遠。蒼茫海日連。雨沉留客住。相對坐談禪。

龔秉直

戊寅春日遊韜光用毛端峰韻

奇境聞韜光。未到境已熟。端峰我執友。紀遊豁心目。

我白雲思

韜光紀遊集家君視學時捐俸助梓故云

丁丑春遊韜光返寓閱二日山止禪師寄箋索題

再賦

數椽小築傍岩扃。夾路幽篁列翠屏。風急瀑添千縷白。雲濃山失萬重青。景逢奇處詩難寫。話到深時酒易醒。惜別再登峰頂望。江湖一抹雨溟溟。

湯右曾

丁丑三月二十一日晚過韜光禪院

澗橋徙倚老松根。肅肅巖扉寂不喧。坐覺清風生石

壁。行窮修竹見山門。依依烟郭江光繞。點點林鴉海氣昏。却怪白沙春漲澗。游人指點說潮痕。

一京江王廷擢

丁丑春杪遊韜光遇雨

不憚登臨倦。精藍暫息肩。小窗依絕壁。修竹夾流泉。縹緲雲山遠。蒼茫海日連。雨沉留客住。相對坐談禪。

龔秉直

戊寅春日遊韜光用毛端峰韻

奇境聞韜光。未到境已熟。端峰我執友。紀遊豁心目。

一逕入煙霞。仄磴互盤曲。藍輿不可度。捫蘿趾相屬。
修篁夾萬仞。影覆一天綠。絡筧引流泉。泠泠漱寒玉。
精舍迴層巖。曠然縱遐矚。夢想垂十年。羈牽痼塵俗。
今來衝泥上。同行客五六。詩句信有徵。隨步若披讀。
上人齊已流。劇喜來不速。揖坐金蓮池。清言沁幽獨。
茶筍次第陳。兼許進醽醕。客意正流連。簷溜斷還續。
烟雲幻函圖。髣髴米家幅。雖迷江海觀。幽勝此亦足。
夙願快已償。後遊期再卜。會當陟其巔。振衣看朝旭。
蕪城卓爾堪。

雲間程揚

雲岌窮千仞。清泉百道流。尋幽來此地。興盡更登樓。

周禹吉

登韜光

每多丘壑趣。置我白雲隈。竹澗飛晴瀑。山花照客杯。
松杉圍鷲嶺。麋鹿上香臺。極目情何限。秋江匹練來。

徐汾

登韜光

寶刹何年構。層軒苔翠封。樓危低海日。山古護雲龍。

幢羽金蓮密。天香紺殿重。欲知初地果。早與扣晨鐘。
宋嗣京

秋日登韜光

纔入韜光路。幽篁曲徑開。小池魚隱躍。高樹嶺崔嵬。
寂寂塵思去。霏霏法雨來。况當秋氣爽。攬勝一徘徊。
卓長齡

和香山韻

絕壑非人境。神仙亦有家。石鯨秋作雨。霜葉晚疑花。
客飽青精飯。丹留白雪芽。欲歸殊未肯。更乞一盃茶。

項奎

丙午七月遊韜光

泠泠石竇瀉寒泉。萬竹虛樓僧慣眠。祇樹林中香作
雨。越山江上翠如蓮。興來支策曾窺海。醉後題詩漫
問天。再詣招提同習靜。夕陽紅葉坐巖前。

項以淳

登韜光次香山韻

林屋重來問耽幽。著處家秋陰生翠碧。危石倚疎花
入竹。探泉竇摩碑拂蘚芽。風流懷白傅。今古一甌茶。

朱爾邁

丙午秋日遊韜光漫成

我本餐霞客。深山到是家。引泉扶野竹。選石間籬花。
天地狂名在。江湖醉眼斜。風流慚白傅。得句漫相誇。

鄧錫璿

寄懷韜光山止上人

高峯古寺陰。倚錫草蘿深。結友同蓮社。題詩徧竹林。
松間傳梵語。石上響瑤琴。咫尺靈山路。雲迷不可尋。
顧之琇

題韜光菴

獨向烟霞裡。追尋羽客蹤。

菴左祠呂純陽故及

空山閒白月。隔

水落芙蓉白石。誰爲芋青林。遍是松仙亭。吹玉笛。飛
上北高峯。

沈賦

重過韜光阻雨晚眺

日暮西風急。重來訪舊遊。夕陽猶在樹。山雨忽驚秋。
嶺斷荒烟外。帆歸古渡頭。幽懷何所寄。憑眺上層樓。
朱兆殷

宿韜光作

經宿禪樓上。泉聲不住流。雨晴竟莫辨。風竹自成幽。
山水仍如昨。衣冠異舊遊。方驚鳴暮鼓。明月上簾鈞。

蔣漢紀

宿韜光留句

鷲嶺懸崖削。山深竹樹幽。飛雲驚鳥道。曲澗引泉流。
剎古烟迷屋。風高春欲秋。我來生靜思。禪榻暫淹留。
爲有尋山興。還看海日生。飛濤峯際渺。野鳥望中鳴。
草淺增沙滑。雲間落澗聲。何年重訪舊。僊徑學吹笙。

